

Il gimnasi ha reactivau sia biblioteca

Allas gimnasiastas ed als gimnasiasts a Mustér stattan ussa puspei 2500 cudischs a disposiziun

DA HANS HUONDER / ANR

■ **Plirs onns ei la biblioteca dil gimnasi dalla claustra a Mustér stada ord funcziun. En vesta agl onn da scola niev ch'entscheiva oz, eis ella vegnida reactivada. La scolasta Claudia Foppa ei responsabla pil menaschi.** Sut il tetg dalla claustra e dil gimnasi a Mustér sesanflan pliras bibliotecas. D'ina vart ei quei la biblioteca claustrala, da l'autra vart la biblioteca romontscha. Quella ei il mument ord funcziun, damai che la localitad anteriura dad ella survescha ussa ad in auter intent. La tiarza biblioteca ei quella dil gimnasi e quella ei stada serrada ils davos onns. «Igl interess persuerter era buca avon maun ed ins ha priorisau autra purschida», di il rector *Roman Walker*. Ussa eis ella puspei accessibla: «Nus essan stai claramain dil meini ch'il gimnasi drovi ina biblioteca. Ina tala ei semplamein centrala per ina scola media. Els cudischs, respectivamein ella litteratura, ses'arva il mund.»

In nova entschatta

Parallelamein sper sia funcziun sco scolasta ha *Claudia Foppa* absolviu igl onn da scola passau la formaziun sco bibliotecara SAB. Naven digl uost entochen igl avrel eis ella serendida mintgamai in di ad jamna a scola per aschia sepreparar pil pensum futur sco responsabla per la biblioteca dil gimnasi da Mustér. Il praticum necessari persuerter ha ella absolviu tier *Christine Bischof*, la menadra dalla biblioteca popolar a Mustér. Ensemen cun in ulteriur



La bibliotecara Claudia Foppa ed il rector dil gimnasi ed internat Roman Walker denter las crunas dalla biblioteca.

FOTO H. HUONDER

magister e dus scholars fuorma Claudia Foppa ussa il team dalla biblioteca dil gimnasi. La purschida cumpeggia 2500 cudischs. D'in vart ei quei in tschuppel publicaziuns da belletristica, da l'autra vart era cudischs tematics davart historia, geografia ni religiun sco era psicologia, filosofia ni era da cuschnar. Ils cudischs che san vegnir empristai gratuitamein dallas scholaras e dils scholars ein tuts da lungatg tudestg. Ils paucs cudischs romontschs ch'eran aunc ella biblioteca plidentavan buca fetg la giuventetgna. Il mument vegn fatg ponderaziuns tgei cudischs romontschs metter a disposiziun. La biblio-

teca ei partida en duas localitads, ina survescha era pigl intent d'instrucziun da gruppas pintgas. «Las duas localitads ein concepidas aschia ch'ella fredan buca da scola. Cheu duei reger in'autra atmosfera, perquei ha ina dallas localitads era numbar da leger», di Roman Walker. La biblioteca dil gimnasi ei dil reminent era ella reit dalla Biblioteca digitala dalla Svizra orientala (Dibios). En quella san cuntegns da cudischs digitala vegnir empustai.

Leger ei obligatori

«Scolaras e scholars dall'emprema entochen la tiarza classa han igl avegnir ina

lecziun ad jamna ch'els vegnan en biblioteca per leger», di Claudia Foppa. Ton Roman Walker sco ella constateschan che leger ei buca enzatgei alla moda veglia: «Tgi che vul far matura in mument sto haver la qualitat da seprofundar en ina tematica. Persuerter ei il leger enzatgei fetg impurtant.» Ella biblioteca stattan medemamein quater tablets a disposiziun. Els ein vegni finanziaj d'in um da Mustér.

Sin giavisch sa era vegnir empustau ella biblioteca litteratura speciala. Medemamein fa la biblioteca dil gimnasi da Mustér diever dalla purschida da Bibliomedia. «Per ina contribuziun pauschala metta quella a disposiziun in contingent da cudischs per in entir onn. Igl ei cudischs actuals e che plidentan la giuventetgna», di Claudia Foppa. Igl avegnir duein ils cudischs en possess dalla biblioteca vegnir sorti mintg'onn tenor diever. Cudischs che vegnan buca nezegiaj du-ein vegnir remplazzai. Cun quella purschida dalla biblioteca speran ils reponsabels d'animar giuvnas e giuvens da prender mintgaton in cudisch enta maun e leger. Enconuschentamein schai la savida ella litteratura. Per ch'els affons sappien quei e vegnien era animai da leger, schai savens era ell'obligaziun dil geniturs. Leu nua ch'ei vegn mo mirau televisiun e buca fatg ina ga ni l'autra ina vise-ta en ina libreria ni ina biblioteca, vegn probablamein negin affon sill'idea ch'ei dess sper la televisiun ed il telefonin era aunc cudischs.